

فريق التفريغ بموقع الطريق إلى الله
يقدم

اليوم التاسع والعشرون من "سلسلة الطريق إلى القرآن"

(باللهجة المصرية)

لفضيلة الشيخ : الدكتور / حازم شومان

رابط المادة : <https://way2allah.com/khotab-item-136.htm>



السلام عليكم ورحمة الله وبركاته، الحمد لله وكفى وصلاة وسلاما على عباده الذين اصطفى، ثم أما بعد، النهاردة مع الجزء ٢٩ يا جماعة، الجزء ٢٩ الخطوة قبل الأخيرة مع كتاب الله سبحانه وتعالى، قولنا امبارح سألنا سؤال أمّا بنهاية الجزء الثامن والعشرين المفروض وظيفة القرآن كدة أو القرآن يريد إنه يقوله لنا، أو اللي احنا محتاجين نفهمه فهمناه، إيه قيمة الجزء ال ٢٩ و ٣٠؟ خلاص **السور المدنية عرفتنا إزاي نبي الدين في الواقع، والسور المكية عرفتنا إزاي نبي الدين في النفس** " معرفة الله والدار الآخرة والمقامات الإيمانية والعبادات " وجه الجزء ٢٨ عرفنا إزاي بعد البيان ده ما قام في حياتنا إزاي ما ينهدمش تاني في حياتنا

إيه قيمة الجزء ٢٩ و ٣٠؟

قولنا إمبارح إن الجزء ٢٨ بيكلم عن الإستقرار، وال ٢٩ و ٣٠ بيتكلموا عن الإستمرار، يعني إيه؟ يعني أنا اتبنيت وعرفت إزاي متهدمش تاني بس أنا هاموت، الصحابة اتبنوا وعرفوا إزاي ما يتهدموش تاني بس الصحابة هيموتوا، الشركة اتعملت والعمال اللي فيها والموظفين عرفوا إزاي يديروها تمام، إزاي يحافظوا عليها من أى سبب من أسباب الخلل أو الهدم، بس كل العمال اللي فيها هيموتوا، يعني إيه؟ يعني الجيل ده اتربي وفهم إزاي يبني وإزاي ما يتهدمش، ولكن الجيل ده هيموت، يبقى لازم تربية أجيال تقدر تشيل الأمر من بعد كدة

طيب واشمعنا الجزئين دول هما اللي جم في الآخر؟ الجزئين دول هما أول جزئين نزلوا في القرآن، دول المعاني اللي ربنا اختارها عشان الصحابة يتربوا عليها في أول مكة، دول الجزئين اللي أى حد هيبص ليهم أول حاجة هتيجي في ذهنه على طول التربية، دول الجزئين اللي الصحابة اتربوا عليهم، دى المعاني اللي لازم تترى عليها وأنت داخل الإلتزام، يعني ربنا وضع الجزئين دول في الآخر ليه يا جماعة؟ عشان يقولنا إن الاستمرار مفتاح التربية، إن لازم كل جيل جديد، لازم كل ملتزم جديد، لازم كل واحد داخل هذا الإلتزام جديد يتربي على معاني الجزئين دول عشان يقدر يقوم بالرسالة بتاعة ال ٢٨ جزء اللي باقين، عشان الدين يستمر

يبقى إذاً لما هنقول مصطلح سنة أولى إلتزام، يبقى إحنا بنقصد بسنة أولى إلتزام إيه؟ إن ده الفترة اللي لازم أى ملتزم جديد يعيشها ويتربي على معاني معينة، المعاني المعينة دى فين؟ الجزء ٢٩ و ٣٠، يبقى الجزء ٢٩ و ٣٠ دول سنه أولى إلتزام اللي ربنا سبحانه وتعالى جابه لنا في آخر القرآن عشان يقولنا إن لازم دول، عشان الدائرة تفضل ممتدة ليوم القيامة لازم الجزئين دول يفضل كل واحد يتربي عليهم في سنة أولى إلتزام

طيب يا جماعة الجزء ٢٩ يعني مهما كانت السور كتيرة بتاعة الجزء إلا إن بينها رابط، حتى الجزء ال ٣٠ السور بتاعته شوف أد إيه من سور القرآن إلا إن بينها ترابط، السورة دى بعد دى ليه، ودى قبل دى ليه

الجزء ٢٩ تخيل كدة إنك واحد رايح تدعوا ناس، أول حاجه هتتكلم فيها إيه؟ من فهم الكلام اللي فات، أول حاجة تتكلم فيها إيه؟ النار؟ والا لجنة؟ والا ربنا؟ ربنا سبحانه وتعالى، تتكلم عن الله، سورة الملك بتتكلم عن الله، بتتكلم عن الملك، طيب لما أنت هتتكلم مع الناس أو الكفرة أو غير الملتزمين عن الله متوقع إنهم هيسـتجيبوا ولا هيجادلوا؟ هيجادلوا، تقوم تيجي سورة ن اللي كلها جدال ليهم، لإنهم هيجادلوك فهتقدر ترد على الجدال ده إزاي؟

طيب يبقى اللي بيجادل ده مشكلته في عقله ولا في قلبه؟ هوا قاعد يقولك أنا مش مقتنع، ولكن مشكلته في قلبه يبقى لازم نلين له قلبه، تيجي الحاقة والمعارج بعد ن علشان ترغيب وترهيب يكسر قلب الحجر، معايا يا جماعة؟ طيب الرجل اللي بيدعو الى الله ده مش محتاج يتزود في الطريق؟ يعني يعد يتكلم وبعد كدة ده يجادله وده يرد عليه وبعد كدة يرد عليهم، ويقعد يكلمهم بعد كدة على الجنة والنار، محتاج زاد في الطريق، يتعلم إزاي يدعو، محتاج فن الدعوة، محتاج صبر على الدعوة، تيجي أربع سور وراء بعض، سورة نوح أطول واحد في تاريخ البشرية صبر على الدعوة إلى الله، وبعد كدة سورة الجن اللي أول ما إلتزموا دعوا إلى الله، وإزاي دعوا إلى الله

بعد كدة المزمل والمدثر قم الليل وقم فأنذر، إزاي تتزود إيمانياً وتتزود بفهم الدعوة قبل ما تتطلق إلى الدعوة، بعد كدة نرجع إلى الدعوة إلى الله تاني، هنبدا بسورة القيامة، سورة القيامة بتكلم مين؟ ما إحنا قاعدين نتكلم أهوه نتكلم نتكلم، فيه واحد من كتر ما بتتكلم يقولك طيب أنا عاوز بس مش قادر، طيب أنا نفسي ألتزم بس مش قادر يعني سورة ن بتكلم واحد مش عاوز، ولكن سورة القيامة بتكلم واحد عاوز، ولكن يعني نفسه بتلومه، النفس اللوامة، ولكن أنا مش قادر على نفسي، فسورة القيامة كلها ترهيب عشان إفاقة هذا الإنسان اللي في غيبوبة، طيب الترغيب ده يعني ريقك بينشف في سورة القيامة، تيجي سورة الإنسان معظمها بتتكلم عن الجنة ونعيم الجنة يعني كأن ريقنا بيتل، بعدها ترغيب وترهيب برده

ثم سورة المرسلات آخر سورة في هذا الجزء، تلاحظ إن آياتها قصيرة جداً وآياتها كثير جداً، كأن طرقات طرقات ليه؟ لأن الوقتي لو إنك بتخبط على واحد نايم جوة والقطر هيفوته وهو نايم جوة، يعني في عز النوم نايم في غيبوبة، مينفعش إنك تخبط بالراحة لازم ترزع على الباب، سورة المرسلات رزع على أبواب القلب لعله يفتح بعد هذا الشوط في الكلام عن الله والدار الآخرة، عايزين نأخذ نبذة سريعة عن كل السور بحيث إن إحنا يكون فيه علاقة قلبية، ولو حتى مجملة بينا وبين كل سورة

سورة الملك... مكونات الملك ثلاثة

سورة الملك يعني تخيل كدة الملك بيتكون من إيه؟ إيه الملك؟ ثلاثة: الملك والمملوك والمملكة هو ده الملك، فسورة الملك أول آية بتكلمك عن الملك

أولاً: الملك

"تَبَارَكَ الَّذِي بِيَدِهِ الْمُلْكُ وَهُوَ عَلَى كُلِّ شَيْءٍ قَدِيرٌ" الملك: ١ مش تبارك الملك "بِيَدِهِ الْمُلْكُ" لما أقول لك بيدي الأمر يعني أنا متحكم في كل شيء فيه، لما أقولك بيده الملك، يعني ربنا بيده مقاليد السموات والأرض، وكل شيء في الكون الله متحكم فيه، "وَهُوَ عَلَى كُلِّ شَيْءٍ قَدِيرٌ" طيب ما ممكن ملك بس مش قادر يهيمن على مقدرات الأمور في

مملكته، مش قادر يتحكم في كل شيء في المملكة، لأ، ده ملك قدير يعنى مش زى ما العلمانيين يريدون أن يكون الله مثل ملكة بريطانيا تملك ولا تحكم، هيا بتملك بس ملهاش دعوة بالحكم، آه ربنا ياعم هو الملك بس الأرض تتحكم من غير قول الله ومن غير حكم الله سبحانه وتعالى!!! لأ، الله هو الملك القادر يبقى ده الملك

ثانيا: المملوك

"الَّذِي خَلَقَ الْمَوْتَ وَالْحَيَاةَ لِيَبْلُوَكُمْ أَيُّكُمْ أَحْسَنُ عَمَلًا وَهُوَ الْعَزِيزُ الْغَفُورُ" الملك: ٢ ده المملوك، الموت قبل الحياة ليه؟ ده انت من أول لحظة اتولدت فيها سهم الموت انطلق اليك، ولا يزال منطلق، وكل يوم بيعدى من عمرك سهم الموت بيقترب إليك أكثر، وكل ما عمرك بيزيد كل ما بتقرب من الموت أكثر، عشان كدة انت في كل لحظة مبتعد عن الحياة مقرب من الموت، فانت دائماً أقرب إلى الموت منك إلى الحياة، فالموت يجي قبل الحياة، غير إن ربنا سبحانه وتعالى خلق في كل خلية من جسمك چين موت، العلماء بيسموه التينوميلز چين موت، چين الموت ده بيقتعد يتاكل يتاكل يتاكل مع العمر، يعنى كل واحد مولود وله أجل محدد إلا اللي بيموت مثلاً مقتول أو أو، إنما كل واحد من اللي بيموت على فراشه له ثانية كل يوم بيتناقص من هذا الچين جزء، لغاية ما يجي في آخر عمره يبقى خلاص اللحظات الأخيرة

من أحسن عملاً؟؟؟

يبقى ربنا يقولك أنت متحكم فيك "الَّذِي خَلَقَ الْمَوْتَ وَالْحَيَاةَ لِيَبْلُوَكُمْ أَيُّكُمْ أَحْسَنُ عَمَلًا وَهُوَ الْعَزِيزُ الْغَفُورُ" الملك: ٢ يبقى الموضوع ده كله ليه؟ يبقى نزلتنا على الأرض دى كلها ليه؟ " لِيَبْلُوَكُمْ أَيُّكُمْ أَحْسَنُ عَمَلًا " مش أيكم أكثر " أَيُّكُمْ أَحْسَنُ " الله إله عظيم أحسن إليك في كل شيء لازم أنت تحسن معاه في العبادة سبحانه وتعالى، وربنا قال " أَيُّكُمْ أَحْسَنُ " ده أحسن ده أفعل تفضيل، يعنى مين أحسن من مين؟ مين أحسن واحد هيصلى التراويح الليلة؟ مين أحسن واحد هيخشع في التهجد الليلة؟ مين أحسن واحد هيعبد ربنا الليلة؟ مين أحسن واحد هيودع رمضان فعلاً فعلاً وداع يستحقه هذا الضيف الكريم؟ مين أحسن واحد صلى فينا العصر بخشوع؟ مين أحسن واحد فينا هيدعو إلى الله؟ مين اللي أحسن يا جماعة؟؟؟ ربنا خلقنا عشان تبقى مسابقة، مسابقة بينا في التنافس في العمل الصالح، وهو العزيز الذي لا يخرج عن حكمه شيء الغفور، طيب أنتم بتخرجوا عن حكمه وهو سبحانه وتعالى تارككم بمشيتته ولكن دى من مغفرة ربنا، الذي لا يرضى إن ذرة في الكون تخرج عن حكمه، ولكن إلى أجل مستمى تارك البشر اللي يخرج منهم عن حكمه يخرج منه إلى أن يلقي الله يوم القيامة، يبقى إذا ده المملوك الضعيف اللي مقدر عليه الموت، اللي محكوم عليه من قبل ما يتولد في أول لحظة من ميلاده بإنطلاق سهم الموت إليه

ثالثا: المملكة

"الَّذِي خَلَقَ سَبْعَ سَمَاوَاتٍ طِبَاقًا مَّا تَرَى فِي خَلْقِ الرَّحْمَنِ مِنْ تَفَاوُتٍ فَارْجِعِ الْبَصَرَ هَلْ تَرَى مِنْ فُطُورٍ" الملك: ٣ خلق الله المعجز، الكون المبهر "فَارْجِعِ الْبَصَرَ هَلْ تَرَى مِنْ فُطُورٍ" بص كدة للسماوات، بص للنباتات، بص في أى علم من علوم الكون " هَلْ تَرَى مِنْ فُطُورٍ " أنت شايف أى نقص؟ شايف أى خلل؟ شايف أى حاجة فيها؟ يا جماعة ربنا خلقه ما فيش فيه أى تفاوت، ما فيش حاجة ربنا خلقها حلوة أوى وحاجة يعنى إيه نص نص، ما فيش حاجة ربنا خلقها محكمة أوى وحاجة نص نص، يعنى أى إنسان أبدع مهندس في الدنيا تلاقيه ممكن يصمم ٣٠ ٤٠ رسم هندسى

مبدعين ويجي ٣ ٤ ميعرفش يصممهم يبقى الإنسان لازم بيضع، إنما **"مَا تَرَى فِي خَلْقِ الرَّحْمَنِ مِنْ تَفَافُوتٍ"** الله كل خلقه معجز مبدع، كل خلقه يعنى وصل إلى الغاية من العلم والقدرة والإبداع سبحانه وتعالى **"فَارْجِعِ الْبَصَرَ هَلْ تَرَى مِنْ فُطُورٍ"** بص للكون كدة أنت شايف أى نقص

ظاهرة الاتساع

"ثُمَّ ارْجِعِ الْبَصَرَ كَرَّتَيْنِ يَنْقَلِبْ إِلَيْكَ الْبَصَرُ خَاسِئًا وَهُوَ حَسِيرٌ" الملك: ٤ بص كمان وتانى وتالت وعاشر يرتد إليك البصر خاسئاً وهو حسير، المملكة، لما تتدبر في الكون، لما تتدبر في السموات تلاقى ظاهرة الإتساع، إيه ده؟ إيه مليارات المجرات والكواكب والنجوم والأقمار، ظاهرة الإتساع

ظاهرة السيطرة

تلاقى ظاهرة السيطرة إن الانسان لما يخترع حاجة وتكبر شوية يفقد سيطرته عليها، إنما الله خلق الكون الواسع ده كله، ومافيش ذرة من الكون فقد سيطرته عليها، ظاهرة التحكم يا جماعة، يعنى تخيل الشباب ولا الغلام اللي قاعد أمام الجيم قاعد يحرك عربية على الأتارى تخيل كده، يعنى هو بيحرك عربية وجاى قصاها عربيات مش عارف يتحكم ممكن يخط، طيب تخيل لو أديته عصاتين عربيتين وقلت له تحكم فيهم، مش ممكن دى الدنيا هتبوظ، طيب تخيل لو أديته عشر عصيات عربيات وقتله اتحكم فيها!

ربنا يا جماعة مليارات المليارات من الكواكب والنجوم والمجرات الله متحكم فيها كلها، ما فيش مرة كوكب اتصدم مع التانى، ما فيش نجم خبط مع التانى، متحكم في سرعاتها وفي إتجاهها وفي مداراتها بحيث إن الكون كله تحت تحكم الله سبحانه وتعالى

ظاهرة الإبداع

ورب المشارق، مليارات النجوم اللي بتشرق على الكواكب اللي بتدور حوالها مليارات، مشاهد الشروق اللي بتطلع في الكون كل يوم، ومشاهد الغروب اللي بتطلع في الكون كل يوم، مش على الأرض بس، يبقى إذا الكون ده مليء بإبداع الله سبحانه وتعالى، ومليء بالحاجات اللي الواحد لازم يتوقف عندها و يتأمل عندها

اللى عصى

طيب دلوقتي في المملكة دى فيه مملوك عصى وفيه مملوك أطاع، المملوك اللي عصى ربنا عمل إيه؟ آه جهنم **"إِذَا رَأَوْهُمْ مِنْ مَّكَانٍ بَعِيدٍ سَمِعُوا لَهَا تَغِيْظًا وَزَفِيرًا * وَإِذَا أُلْقُوا مِنْهَا مَكَانًا ضَبِّقًا مُقَرَّنِينَ دَعَوْا هُنَالِكَ ثُبُورًا"** الفرقان ١٢ : ١٣ يبقى إذا جهنم يا جماعة **"إِذَا أُلْقُوا فِيهَا سَمِعُوا لَهَا شَهِيْقًا وَهِيَ تَفُورٌ"** الملك: ٧ يبقى الآية الأولانية زفير جهنم والآية الثانية شهيق - الزفير في الفرقان والشهيق في سورة الملك هنا - جهنم بتزفر وتشهق لما تشوف الجرم من بعيد، بتزفر عشان تطلع له حرها ولما يقرب منها من بعيد تشهق عشان تبلعه في جوفها، كأن جهنم دى عبد من عبيد الله السورة بتقولك إن كل اللي في المملكة عبيد، الموت طلع مخلوق **"الَّذِي خَلَقَ الْمَوْتَ"** الجنة والنار طلعت عبد وظيفته إنه يعذب الناس **"إِذَا رَأَوْهُمْ مِنْ مَّكَانٍ بَعِيدٍ سَمِعُوا لَهَا تَغِيْظًا وَزَفِيرًا * وَإِذَا أُلْقُوا مِنْهَا مَكَانًا ضَبِّقًا مُقَرَّنِينَ دَعَوْا هُنَالِكَ ثُبُورًا"** الفرقان ١٣: ١٢ آيات الزفير طيب وآيات الشهيق **"إِذَا أُلْقُوا فِيهَا سَمِعُوا لَهَا شَهِيْقًا وَهِيَ تَفُورٌ * تَكَادُ تَمَيِّزُ مَنْ**

الْعَيْطُ كُلَّمَا أُلْقِيَ فِيهَا فَوْجٌ سَأَلَهُمْ خَزَنَتُهَا أَلَمْ يَأْتِكُمْ نَذِيرٌ" الملك ٧: ٨ متغاضة " تَكَادُ تَمَيِّزُ مِنَ الْغَيْطِ كُلَّمَا أُلْقِيَ فِيهَا فَوْجٌ سَأَلَهُمْ خَزَنَتُهَا أَلَمْ يَأْتِكُمْ نَذِيرٌ * قَالُوا بَلَى قَدْ جَاءَنَا نَذِيرٌ فَكَذَّبْنَا وَقُلْنَا مَا نَزَّلَ اللَّهُ مِن شَيْءٍ إِنْ أَنْتُمْ إِلَّا فِي ضَلَالٍ كَبِيرٍ * وَقَالُوا لَوْ كُنَّا نَسْمَعُ أَوْ نَعْقِلُ مَا كُنَّا فِي أَصْحَابِ السَّعِيرِ * فَاعْتَرَفُوا بِذَنبِهِمْ فَسُحِقًا لِأَصْحَابِ السَّعِيرِ" الملك ١١: ٨ يبقی إذا المملوك اللي عصی

اللى أطاع

طب المملوك اللي أطاع "إِنَّ الَّذِينَ يَخْشَوْنَ رَبَّهُم بِالْغَيْبِ لَهُمْ مَغْفِرَةٌ وَأَجْرٌ كَبِيرٌ" الملك: ١٢ "الَّذِينَ يَخْشَوْنَ" مش يخافون، الخشية هي الخوف مع التعظيم، وده لازم يكون عندنا مش بس خايف من النار وكمان معظم لمقام الله سبحانه وتعالى "إِنَّ الَّذِينَ يَخْشَوْنَ رَبَّهُم بِالْغَيْبِ لَهُمْ مَغْفِرَةٌ وَأَجْرٌ كَبِيرٌ" الملك: ١٢ بالغيب يعني إيه؟ يعني زى عثمان بن عفان لما قال: "والله لو تهتكت الحجب ورأيت الجنة ورأيت النار ورأيت ربى مازدت يقيناً"

أنا بالغيب زى الشهادة، عندى اليقين الكامل، عشان كدة أنا بأعبد ربنا وأنا مش شايفه زى لو شوفت ربنا سبحانه وتعالى، ليه؟ اليقين الكامل يا جماعة "هُم مَغْفِرَةٌ وَأَجْرٌ كَبِيرٌ" طيب ما ربنا كان ممكن يقول لهم أجر ومغفرة، لأ، أصل حلم المؤمن فى حياته إنه يتغفر له، فربنا جاب الأول الحاجة اللي المفروض هي أكثر حاجة قلقاك فى حياتك إن أنا يتغفر لى، عشان كدة لما الرسول صلى الله عليه وسلم لما وصى السيدة عائشة بدعاء فى ليلة القدر مقلهاش قولى اللهم أدخلنى الفردوس الأعلى، قال لها قولى "اللهم إنك عفو تحب العفو فاعفو عني" صحيح أهم حاجة المغفرة، أهم حاجة العفو، أهم حاجة الصفح من الله سبحانه وتعالى

"وَأَسْرُوا قَوْلَكُمْ أَوْ اجْهَرُوا بِهِ إِنَّهُ عَلِيمٌ بِذَاتِ الصُّدُورِ" الملك: ١٣ طيب الوقتى دى العقوبة الأخروية، وده الثواب الأخروى للمملوك اللي عصى، والمملوك اللي أطاع، طب فى الدنيا الله هو الذى يملك الأمن، والله هو الذى يملك الرزق، فربنا سبحانه وتعالى هدد البشر إنه ممكن يسحب منهم الأمن، وممكن يسحب منهم الرزق لو عصوا الله سبحانه وتعالى، يبقی العقوبات فى الدنيا قبل الآخرة

نعم الله الكثيرة

"هُوَ الَّذِي جَعَلَ لَكُمْ الْأَرْضَ ذُلُولًا فَامْشُوا فِي مَنَاكِبِهَا وَكُلُوا مِن رِّزْقِهِ وَإِلَيْهِ النُّشُورُ" الملك: ١٥ ذلول زى الدابة الذلول، يعنى كأن الأرض نفسها عبد الله، كأن الأرض دابة من دواب الله اللي بتعبده، وربنا أمرها إنها تذلل للإنسان، يعنى لما تيجى ترمى بذرة، الأرض مش هتقولك استنى انت مؤمن ولا كافر، انت صليت الفجر النهاردة ولا مصليتتهوش، أنت بتصلى ولا لأ، لأ ذلول، لىك فى الدنيا ذلول

"فَامْشُوا فِي مَنَاكِبِهَا" ربنا ليه فى الدنيا مقالش اسعوا؟ يعنى فيه ناس بتقولك ربنا قال فى الآخرة اسعوا، يعنى اجرى انطلق فى الآخرة إلى الله، إنما فى الدنيا بالراحة، ليه يا جماعة ربنا مقالش فى الدنيا واسعوا فى مناكبها، وقال وامشوا فى مناكبها؟ عشان حاجة مهمة أوى يا جماعة هي إيه؟ إن انت لما أقولك أنا جايلك مثلاً وأقوم نازل، يعنى بينى وبينك مسافة لا أمشى فيها، ما اركبش ولا أروح مستعجل ولا أجرى، لما أكون ضامن إنك هتستتنانى، لما أكون ضامن إنك

انت مش هتنزل وتسييني، ربنا بيقولك روح لرزقك وانت موقن إن اللي ربنا كاتبه لك مش هيسيبك أبداً، وانت موقن إن رزقك مش هيخطفه منك حد أبداً

امشى فى الدنيا وانت مطمئن بالله، امشى فى الدنيا وأنت قلبك معلق بالله، مانتاش قلبك معلق بالدنيا، امشى فى الدنيا وأنت قلبك معلق بمنايع التقسيم، مش بمراكز التسليم اللي فى الدنيا "فَامْشُوا فِي مَنَاكِبِهَا وَكُلُوا مِنْ رِزْقِهِ وَإِلَيْهِ النُّشُورُ" الملك: ١٥ أوعى تفكر إن الرزق اللي جالك ده بسعيك، ده من رزق الله، ده من كرم ربنا سبحانه وتعالى عليك "وَكُلُوا مِنْ رِزْقِهِ وَإِلَيْهِ النُّشُورُ" الملك: ١٥ يعنى إيه "وَإِلَيْهِ النُّشُورُ"؟ الراجل نازل يسعى على بيته وولاده دلوقتي، أقول له افتكر النشور ليه؟ لأنى بقوله افتكر إن زى ما الدنيا محتاجة سعى الآخرة محتاجة سعى، أوعى سعى الدنيا ينسبك سعى الآخرة، عشان كدة الأثنين جاين مع بعض، عشان ربنا كأنه يقولك اوعى سعيك فى الدنيا ينسبك سعيك للآخرة

"أَمِنْتُمْ مَن فِي السَّمَاءِ أَنْ يَخْسِفَ بِكُمُ الْأَرْضَ فَإِذَا هِيَ تَمُورُ * أَمْ أَمِنْتُمْ مَن فِي السَّمَاءِ أَنْ يُرْسِلَ عَلَيْكُمْ حَاصِبًا فَسَتَعْلَمُونَ كَيْفَ نَذِيرٍ * وَلَقَدْ كَذَّبَ الَّذِينَ مِن قَبْلِهِمْ فَكَيْفَ كَانَ نَكِيرٍ * أَوَلَمْ يَرَوْا إِلَى الطَّيْرِ فَوْقَهُمْ صَافَاتٍ وَيَقْبِضْنَ مَا يُمَسِّكُهُنَّ إِلَّا الرِّحْمَنُ إِنَّهُ بِكُلِّ شَيْءٍ بَصِيرٌ * أَمَّنْ هَذَا الَّذِي هُوَ جُنْدٌ لَّكُمْ يَنْصُرُكُم مِّن دُونِ الرَّحْمَنِ إِنِ الْكَافِرُونَ إِلَّا فِي غُرُورٍ" الملك: ١٦: ٢٠ ده تهديد فى الأمن والا فى الرزق؟ فى الأمن، الحسف والمال كل ده تهديد فى الأمن "أَمَّنْ هَذَا الَّذِي يَرْزُقُكُمْ إِنْ أَمْسَكَ رِزْقَهُ بَلْ جُبُوا فِي عُتُوٍّ وَنُفُورٍ" الملك: ٢١ يبقى تهديد فى الأمن والرزق، لو أنت الحاجاتين اللي أنت بتعطى ربنا ظهرك عشانهم، ربنا هدد الناس بيهم لو أعرضوا عن الله فى طلبهم "أَفَمَن يَمْشِي مُكِبًّا عَلَى وَجْهِهِ أَهْدَى أَمَّن يَمْشِي سَوِيًّا عَلَى صِرَاطٍ مُسْتَقِيمٍ" الملك: ٢٢ واحد ماشى سوى، هو سوييعنى هو صح، والطريق اللي ماشى فيه طريق مستقيم ومعبد ممهده مش هيقع، إنما واحد تانى مكباً على وجهه، واخذ السكة كلها عشاء على وشه، عشاء على وشه، المكب على وشه ده اللي يمشى و يأخذ عشاء على وشه، يقوم يمشى يأخذ عشاء على وشه، ده مثل العاصى، مثل المفتون، اللي كل شوية ياخذ عشاء على وشه، كل ما يتعرض عليه فتنة يقع فيها كأنه وقع على وشه، كل شوية معصية معصية فده مثل وده مثل يبقى أنت عايز تبقى إيه؟ يبقى سورة الملك يا جماعة بتتكلم عن الملك الله سبحانه وتعالى، كلها بتتكلم عن هيمنة أمر الله على الكون، وأن الله هو الذى يملك مقدرات كل شىء، هو الذى بيده الأمن والرزق والنفع والضرر، هو الملك لهذه المملكة، الذى بيده الملك ويده مقاليد الأمور، الملك.. المملوك.. المملكة، عقاب المملوك اللي بيعصى، ثواب المملوك اللي هيطيع، أد إيه الله الملك يقدر يعاقبك فى الدنيا زى ما يقدر يعاقبك فى الآخرة هي دى المعانى اللي سورة الملك بتتكلم عنها سورة القلم تيجى سورة ن، بتتكلم عن إيه سورة القلم؟ تتكلم عن ناس بيجادلوننا، ناس مش عايزة، ناس بتحاربنا، ناس بتجادلنا، شوف ربنا بيجادل بيقولنا إيه من الأول "ن وَالْقَلَمِ وَمَا يَسْطُرُونَ" القلم: ١ الدين ده احترام العلم جداً، يعنى لما ربنا يقسم بالقلم، القلم ده لولا الله ثم هو مكنش علم السابقين حفظ، لولا الله ثم هو مكنش حكمة الأولين اتعرفت، القلم ده يا جماعة من أعظم مخلوقات الله، بل يعنى لعله من أعظم مخلوقات الله على الإطلاق، أول كلمة نزلت فى القرآن إقرأ، القراءة والكتابة يبقى العلم، مفردات العلم الدين ده بيحترم العلم ولكن "ن وَالْقَلَمِ وَمَا يَسْطُرُونَ" القلم: ١ يعنى شايف القلم ونعمة

القلم، ويمكن ينكتب بيه كلام عن ربنا قد إيه، إلا إنهم شوفوا بيكتبوا عن ربنا إيه، شوفوا الشبهات اللي بيكتبوها عن الدين، شوفوا الحرب الكتابية الفكرية اللي هما بيكتبوها ضد الدين

الدين الأخلاق

" **ن وَالْقَلَمِ وَمَا يَسْطُرُونَ * مَا أَنْتَ بِنِعْمَةِ رَبِّكَ بِمَجْحُونٍ * وَإِنَّ لَكَ لَأَجْرًا غَيْرَ مَمْنُونٍ * وَإِنَّكَ لَعَلَى خُلُقٍ عَظِيمٍ** " القلم ١ :
 ٤ الناس معتقدة، أو كثير من الناس يفسرها إن أخلاق الرسول أخلاق عظيمة، يا جماعة ابن عباس يقول: " **إنك لعلی خلق عظیم یعنی إنك علی دين عظیم** "، ربنا سمى الدين خلق
 والرسول صلى الله عليه وسلم قال " **إنما بعثت لأتمم مكارم الاخلاق** " السلسلة الصحيحة للألباني يعني يارسول الله كنت ممكن تقول لأتمم العبادات، لا، مكارم الأخلاق، الدين هو الأخلاق، كأن ربنا يقول لنا إن في المرحلة دى اللي الدين بيتحارب فيها لازم معجزة الإسلام الأخلاقية تظهر علينا، لازم نبقى أخلاق، لازم يعنى معاملتنا للمرأة، معاملتنا لزوجاتنا، معاملتنا لأولادنا، معاملتنا للأطفال، معاملتنا للكبير والصغير، معاملتنا للمجتمع، معاملتنا لزملائنا، معاملتنا لغيرنا، معاملتنا لرحمنا، لازم أخلاق الدين تظهر " **وَإِنَّكَ لَعَلَى خُلُقٍ عَظِيمٍ** " القلم: ٤ ربنا سمى الدين خلق لأن الدين كله خلق أصلاً، ما هو الدين بيلمك كيف تتعامل مع الله، أو كيف تتعامل مع نفسك، أو كيف تتعامل مع الناس، الدين كله أخلاق، الدين هو الأخلاق، الإسلام معجزته الأساسية معجزة الأخلاق

قصة أصحاب الجنة

الجزء ٢٩ و ٣٠ يركزوا على نقطة الأخلاق دى جداً ليه؟ عشان نهر الناس بالدين، لأن هو ده الدين " **وَإِنَّكَ لَعَلَى خُلُقٍ عَظِيمٍ** " القلم: ٤ حتى شوفوا القصة اللي ربنا بيجادلهم بيها، بيجادل بيها المشركين " **إِنَّا بَلَوْنَاهُمْ كَمَا بَلَوْنَا أَصْحَابَ الْجَنَّةِ إِذْ أَقْسَمُوا لَيَصْرِمُنَّهَا مُصْبِحِينَ** " القلم: ١٧ ناس كانوا عندهم جنة وارثينها عن أبوهم، ثلاثة أخوات، الجنة دى بتجيب فواكه كل سنة و.. و.. وكان أبوهم متعود أن يدي للفقراء والمساكين، دول جم بعد موت أبيهم وقالوا لا احنا نعطي للفقراء والمساكين ليه؟ احنا نعين الرزق ده لينا وملناش دعوة بأى فقير، ولا فقير هيجى هندية " **إِنَّا بَلَوْنَاهُمْ كَمَا بَلَوْنَا أَصْحَابَ الْجَنَّةِ إِذْ أَقْسَمُوا لَيَصْرِمُنَّهَا مُصْبِحِينَ * وَلَا يَسْتَنْتُونَ** " القلم ١٧ : ١٨ هنروح نقطع كل الثمار اللي فيها " **وَلَا يَسْتَنْتُونَ** " مفيش ولا فقير واحد هنستنيه وهنديه " **إِذْ أَقْسَمُوا لَيَصْرِمُنَّهَا مُصْبِحِينَ * وَلَا يَسْتَنْتُونَ** " ناموا على هذه النية

" **فَطَافَ عَلَيْهَا طَائِفٌ مِّن رَّبِّكَ وَهُمْ نَائِمُونَ** " القلم: ١٩ شايف ربنا، شايف قدرة الله، الآيات اللي زى كدة تحسسك بقدرة الله، تحسسك إن ربنا مهيمن على كل شىء، أما يريد أنه ينزل عقوبة، الله له جنود السموات والأرض " **فَطَافَ عَلَيْهَا طَائِفٌ مِّن رَّبِّكَ وَهُمْ نَائِمُونَ * فَأَصْبَحَتْ كَالصَّرِيمِ** " القلم ١٩ : ٢٠ يعنى كل الثمار اللي فيها اقتطعت يدخلوا ميلاقوش ثمار " **فَأَصْبَحَتْ كَالصَّرِيمِ * فَتَنَادُوا مُصْبِحِينَ** " القلم ٢٠ : ٢١ صحيو الصبح " **أَنْ اغْدُوا عَلَيَّ حَرْثِكُمْ إِنْ كُنْتُمْ صَارِمِينَ** " القلم: ٢٢ يالا لو كنتم فعلا جادين يالا بسرعة إلى الجنة عشان نقطع الثمار اللي فيها " **وَعَدُوا عَلَيَّ حَرْدٍ قَادِرِينَ** " القلم: ٢٥ حرد يعنى قوة وقدرة ومنعة " **قَادِرِينَ** " يعنى إيه؟ يعنى ربنا بيسخر منهم يقول فعلاً هما لما شافوها وراحولها لقوا إنهم فعلا قادرين إنهم مايعطوشا لأى فقير أى حاجة، بس مش لأهم ملكوا الثمار وعانوها، لأ،

لأنهم أصلاً ملقوش حاجة فسخرية الله سبحانه وتعالى بهم "وَعَدُوا عَلَىٰ حَرْدٍ قَادِرِينَ * فَلَمَّا رَأَوْهَا قَالُوا إِنَّا لَضَالُونَ" القلم: ٢٥ : ٢٦ دى مش جنتنا! ده مش ممكن! دى كانت لسة مزهزة وناضجة! "فَلَمَّا رَأَوْهَا قَالُوا إِنَّا لَضَالُونَ * بَلْ نَحْنُ مَحْرُومُونَ * قَالَ أَوْسَطُهُمْ أَلَمْ أَقُلْ لَكُمْ لَوْلَا تُسَبِّحُونَ * قَالُوا سُبْحَانَ رَبِّنَا إِنَّا كُنَّا ظَالِمِينَ" القلم: ٢٦ : ٢٩ يبقى يا جماعة القصة دى بتقولك إيه؟ القصة دى مش جايبة ناس أشركوا بالله خدوا بالكم من المعاني العظيمة دى، القصة مش جايبة ناس أشركوا بالله، دى جايبة ناس مرحموش الفقير والمسكين جايبة ناس مدوش من المال بتاعهم للفقرا، جايبة ناس مشتغلتش فى صنائع المعروف وكفالة اليتامى والفقراء والسعى على الأرامل والمسكين، يعنى إيه يا جماعة؟ قضية التوحيد فى القرآن ربنا حط جنبها على طول فى سور كتير قضية الرحمة بالفقراء والمسكين، كأن الإسلام بيقولك لازم تبقى أخلاقك عظيمة، لدرجة الفقراء والمسكين ده هيبقى جزء كبير جداً من سعيك على رعاية مصالحهم يبقى سورة ن بتقولك إيه؟ قبل ما تجادل، النصف الثانى من السورة كله جدل ورد عليهم ورد على شبهاتهم النصف الأولانى قبل ما تجادل أبرز النقاط العظيمة فى دينك، زى قضية العلم وإحترام الإسلام للعلم وتعظيم الإسلام للعلم، إبرز النقاط العظيمة فى دينك زى قضية الأخلاق وعظمة الأخلاق، خليك إنسان ذو أخلاق حتى مع الفقراء والمسكين، يبقى العلم والأخلاق، لما تدخل بهذه الوجوه العظيمة للدين تتكلم هتبقى واقف من منطق قوة، باقى الشبهات سرعان ما يندك بنيان الباطل أمام ردود الحق، بس لو أنت الأول الناس شايفة إن ده فعلاً دين عظيم، بعد كدة الحاقة والمعارج من اسمهم هنعرف موضوعهم

سورة الحاقة

الحاقة موضوعها إيه؟ من اسمها هتتعرف، الحاقة، العلماء بتقولك مد ست مدود، الطامة الصاخة، إيه المد الطويل ده؟ ليه المد الطويل ده؟ ليه ربنا جابها كده بالمد الطويل ده؟ من اسمها كده تحس إن اليوم ده إيه، لما أقولك الحاقة؟ تحس إن اليوم ده إيه؟ طويل، كأن ربنا بيقولك إن يوم القيامة ده يوم طوييييييل أوى، كأن الكلمة نفسها بتبين لك طول هذا اليوم، كأن ربنا بيقولنا من أولها كدة افتركوا إن فيه يوم طوييييييل، يعنى من عمر الأرض لغاية الوقتى ما يجيش ربه ولا خمسه، افتركوا إن اليوم طويل عملت له إيه؟ " فَأَمَّا مَنْ أُوْتِيَ كِتَابَهُ بِيَمِينِهِ " الحاقة : ١٩ " وَأَمَّا مَنْ أُوْتِيَ كِتَابَهُ

بِشْمَالِهِ " الحاقة : ٢٥ فرحان جدا

" فَأَمَّا مَنْ أُوْتِيَ كِتَابَهُ بِيَمِينِهِ فَيَقُولُ هَٰؤُلَاءِ أَفْرُؤُوا كِتَابِيهِ * إِنِّي ظَنَنْتُ أَنِّي مُلَاقٍ حِسَابِيهِ * فَهُوَ فِي عِيشَةٍ رَاضِيَةٍ " الحاقة : ٢١ : ١٩ ده شريط فيديو متسجل بيتفرج على نفسه وهو البطل بتاع الفيلم، فيقول تعالوا اتفرجوا، ده مش هيتفرجوا واحد والا مجموعة فى مسجد والا أقربائه، ده الخلق أجمعين هيتفرجوا عليه، تعالوا اتفرجوا عليّ، شايف منظره، فيلم بيصور منظره وهو صاحى ويفرك عينيه، وهو تعبان وعاوز ينام بس قام واتوضى وذكر ربنا وقعد يصلى وبكى، شايف المنظر الجميل؟ فرحان بمنظره

وفيلم تانى وهو نازل فى الحر وقاعد يشتري أكل ورز وزيت وحاجات من الحاجات دى، وبعد كدة راح لواحد فقير إداله الأكل ده، والفقير أد إيه فرح لما هو مشى وولاده كلوا وأد إيه، فرحان تعالوا شوفوا، تعالوا شوفوا تحيل لو أنت بتفرج على نفسك وأنت بتعمل كده، تبقى سعيد أد إيه؟ تبقى طاير، تبقى هتتجنن، مش قادر من كتر الفرحة، منظره

وهو ببوس يد أبيه ومنظره وهو ببوس يد والدته، منظره وهو يبصلي ويبكي، منظره بقى وأنت قاعد بتعبد ربنا، وقاعد الفيلم يتعرض تخيل أمام الخلائق كلها

أمنيته تتسوى به الأرض!

"وَأَمَّا مَنْ أُوتِيَ كِتَابَهُ بِشِمَالِهِ فَيَقُولُ يَا لَيْتَنِي لَمْ أُوتَ كِتَابِيهِ" الحاقة: ٢٥ منظره وهو بيعصي ربنا، منظره وهو يبزي والعياذ بالله بيتفرج على نفسه وهو بيعصي ربنا، تخيل منظره يبقي إيه؟! عايز يموت نفسه "يَوْمَئِذٍ يَوَدُّ الَّذِينَ كَفَرُوا وَعَصَوُوا الرَّسُولَ لَوْ تُسَوَّى بِهِمُ الْأَرْضُ وَلَا يَكْتُمُونَ اللَّهَ حَدِيثًا" النساء: ٤٢ أمنيته تتسوى به الأرض! "وَأَمَّا مَنْ أُوتِيَ كِتَابَهُ بِشِمَالِهِ فَيَقُولُ يَا لَيْتَنِي لَمْ أُوتَ كِتَابِيهِ * وَلَمْ أَدْرِ مَا حِسَابِيهِ * يَا لَيْتَهَا كَانَتِ الْقَاضِيَةَ * مَا أَغْنَىٰ عَنِّي مَالِيهِ * هَلْكَ عَنِّي سُلْطَانِيهِ" الحاقة: ٢٥: ٢٩ مهوا خد بالك انت لو زادك في القبر عربية مش هتتفعلك، لو زادك في القبر عمارة مش هتتفعلك، لو زادك في القبر فلوس مش هتتفعلك، مش ده الزاد بتاع الآخرة، الزاد بتاع الآخرة العمل الصالح "خُدُوهُ فَعَلُّوهُ * ثُمَّ الْجَحِيمَ صَلُّوهُ * ثُمَّ فِي سِلْسِلَةٍ ذَرْعُهَا سَبْعُونَ ذِرَاعًا فَاسْلُكُوهُ" كل ده ليه يارب؟ الأغلال والسلاسل والجحيم، كل ده ليه يارب؟ عشان جرمتين "إِنَّهُ كَانَ لَا يُؤْمِنُ بِاللَّهِ الْعَظِيمِ * وَلَا يَحْضُ عَلَىٰ طَعَامِ الْمِسْكِينِ" الحاقة: ٣٠: ٣٤ شوفتوا بنلف ونرجع للنقطة، ربنا وضع القضيتين جنب بعض؟ شايفين عظيمة ديننا يا جماعة؟ ربنا وضع جريمة عدم تعظيم الله والشرك بالله جنب جريمة عدم اعطاء الفقير حقه، وعدم السعي للفقراء شايفين يا جماعة السلوك الإجتماعي في الإسلام عظيم إزاي؟ شايفين أد ايه الإسلام بيركز علي قضية الأخلاق وبيركز علي قضية الرحمة بالفقراء، لازم نبقي كدة

احنا قلنا الجزء ال ٢٩ و ال ٣٠ دول سنة أولى إلتزام، دول المعاني اللي لازم تترى عليها وتتأصل في قلبك، المعاني الإيمانية اللي احنا هنفضل نقولها دي لازم تترى عليها، معاني الأخلاق بتركز علي المعاني دي، والجزء ال ٣٠ بيركز تركيز مكثف زي ما هنتكلم بكرة بإذن الله علي معاني الأخلاق بطريقة تحس فعلاً من أولها لازم تبقى نموذج اوعى تهدم الدين بأخلاقك، فيه ملتزمين يا جماعة كانت دخلتة الجامع دَخَلَتْهُ لَوَاحِدٌ وَقَفَلَتْ ل ١٠ لانه لما دخل الجامع خرج الناس كرههم في حياتهم وكرهم في الدين وكرهم في الإلتزام، خليك مكسب لدينك، متبقاش خسارة عليه خليك إنسان بأخلاقك مكسب للإلتزام بأخلاقك، وبعد كدة بدينا ودعوتك وعلمك وفهمك للدين وكلامك في الدعوة تبقي مكسب أكثر وأكثر كمان، يبقي عايزين نبقي مكسب لديننا يا جماعة، عايزين نبقي نساوي حاجة عند الدين "ثُمَّ فِي سِلْسِلَةٍ ذَرْعُهَا سَبْعُونَ ذِرَاعًا فَاسْلُكُوهُ * إِنَّهُ كَانَ لَا يُؤْمِنُ بِاللَّهِ الْعَظِيمِ * وَلَا يَحْضُ عَلَىٰ طَعَامِ الْمِسْكِينِ" الحاقة ٣٢: ٣٤ سورة المعارج سورة المعارج بتتكلم عن إيه؟ من اسمها كدة لما ربنا يقول "تَعْرُجُ الْمَلَائِكَةُ وَالرُّوحُ إِلَيْهِ فِي يَوْمٍ كَانَ مِقْدَارُهُ خَمْسِينَ أَلْفَ سَنَةٍ" المعارج: ٤ سورة المعارج بتقولك إيه؟ إن الملائكة بتعرج إلى الله تطلع تطلع إلى ربنا سبحانه وتعالى، أنت كمان لازم تكون في معراج مستمر إلى الله، لازم كل يوم تقرب من ربنا خطوة جديدة، ده موضوع سورة المعارج

سورة المعارج بتري فيك في أول إلتزامك، اوعى يعدي عليك يوم من غير ما تقرب من ربنا خطوة جديدة، لازم كل يوم خطوة لازم، يعني التشبيه الجميل أوي اللي سمعته من أحد الاخوة اللي بتعمل الجلسات بعد التراويح بيقولك العربية

بتنقل على الأول على الثاني على الثالث على الرابع، يقولك لازم تنقل، شوف نفسك في رمضان لو أنت عايز تثبت بعده، إنت مكنتش بتصلي؟ يبقى أنقل علي الأول صلي، ولو أنت كنت بتصلي أنقل علي الثاني أحضر دروس وأسمع شرايط وأحفظ قرآن، طب أنت كنت بتعمل الكلام ده أنقل علي الثالث أدعو إلى الله شايفين يا جماعة لازم نقل بإستمرار، لازم كل يوم تكون بتزيد عن اليوم اللي قبله، لازم كل يوم تقرب من ربنا خطوة فأنت أيها المؤمن في معراج مستمر إلى الله، فين الكلام ده؟ الكلام ده في قول الله سبحانه وتعالى **"إِنَّ الْإِنْسَانَ خُلِقَ هَلُوعًا"** المعارج: ١٩ فرع يفرع من أي حاجة، أي حاجة! يطلع كوكبيعة في رجله أحسن يكون سرطان، يجي له نغزة في صدره أحسن يكون ورم، يدخل كلية طب يدرس له مرضين في سنه تالته، يعيش ثلاث أربع سنين الأمراض دي عنده، الإنسان فرع، الانسان قلق دائماً **"إِنَّ الْإِنْسَانَ خُلِقَ هَلُوعًا * إِذَا مَسَّهُ الشَّرُّ جَزُوعًا"** المعارج ١٩ : ٢٠ يتربع أول ما يحصل أي حاجة شر **"إِنَّ الْإِنْسَانَ خُلِقَ هَلُوعًا * إِذَا مَسَّهُ الشَّرُّ جَزُوعًا * وَإِذَا مَسَّهُ الْخَيْرُ مَنُوعًا"** المعارج ١٩ : ٢١ يحاسب عليه، خايف لحسن يروح منه، خايف يدي للفقير أو يدي للمسكين، أو يدي للناس أو يوزع الخير اللي عنده، ده فطرة الإنسان في الصفر، ده الإنسان قبل التهذيب الإيماني

خطوات الطريق إلى الله

شوف بعد التهذيب الإيماني إزاي كل يوم بيطلع خطوة **"إِلَّا الْمُصَلِّينَ * الَّذِينَ هُمْ عَلَى صَلَاتِهِمْ دَائِمُونَ"** المعارج ٢٢ : ٢٣ يعني بيحافظ على مواعيد الصلاة، ميقطعش ولا فرض، مش سطر وسطر يبقى دي أول خطوة، طب الخطوة اللي بعد كدة **"وَالَّذِينَ فِي أَمْوَالِهِمْ حَقٌّ مَّعْلُومٌ * لِلْسَّائِلِ وَالْمَحْرُومِ"** المعارج ٢٤ : ٢٥ إنسان بينفق يعني الصلاة بدأت تجيب في قلبه إيمان، بدأ يبقى فيه رحمة على المخلوق فبدأ ينفق، الصلاة والإنفاق الأتنين عبادات **"وَالَّذِينَ فِي أَمْوَالِهِمْ حَقٌّ مَّعْلُومٌ * لِلْسَّائِلِ وَالْمَحْرُومِ"** المعارج ٢٣ : ٢٤ يعني مثلاً أنا عُشر مالي لله لو جالي ١٠٠٠ أطلع ١٠٠، لو جالي ١٠ أطلع جنيه، يبقى الصلاة والإنفاق عبادات، العبادات بتزكي النفس بتزود اليقين **"وَالَّذِينَ يُصَدِّقُونَ بِيَوْمِ الدِّينِ"** المعارج: ٢٦ يبقى يجي التصديق مع العبادات، اللي عايز إيمانه يكمل، اللي عايز مايحيش قصاده أي شكوك، اللي عايز يقينه يعلى ويرتقي، العبادات يا جماعة، العبادات بتخلي قلبك نور علي نور لا ينفذ إليه أبداً أي شبهة ولا أي شك

"وَالَّذِينَ يُصَدِّقُونَ بِيَوْمِ الدِّينِ" طب لما جه التصديق في قلبه بدأ يخاف **"وَالَّذِينَ هُمْ مِّنْ عَذَابِ رَبِّهِمْ مُّشْفِقُونَ * إِنَّ عَذَابَ رَبِّهِمْ غَيْرُ مَأْمُونٍ"** المعارج ٢٧ : ٢٨ بدأوا يخافوا ليه؟ بدأوا يفهموا إنهم ممكن يعذبوا في الآخرة فبدأوا يخافوا، شوفوا كل آية خطوة بعد الآية اللي قبلها، طب لما بدأ يخاف **"وَالَّذِينَ هُمْ لِفُرُوجِهِمْ حَافِظُونَ * إِلَّا عَلَىٰ أَزْوَاجِهِمْ أَوْ مَا مَلَكَتْ أَيْمَانُهُمْ فَإِنَّهُمْ غَيْرُ مَلُومِينَ"** المعارج ٣٠ : ٢٩ يبقى بدأ الخوف يثمر إنه يحكم شهواته : شهوة المال، شهوة النساء، أي شهوة بدأ يتحكم في شهواته، يعني بدأ يطبق الأحكام، بس الأحكام لأ، ده بدأ يطلع

"وَالَّذِينَ هُمْ لِأَمَانَاتِهِمْ وَعَهْدِهِمْ رَاعُونَ" المعارج ٣٢ إنسان بيحفظ الأمانة والعهد، المعاملات كمان، المعاملات اللي هي أصعب من العبادات، طب اللي بعد كدة **"وَالَّذِينَ هُمْ بِشَهَادَاتِهِمْ قَائِمُونَ"** المعارج: ٣٣ بيشهد لله شهادة الحق دائماً، طب ممكن حد يعمل فيه حاجة، لا أخاف في الله لومة لائم، شايفين بنطلع إزاي كل آية أعلى من الآية اللي

قبلها، وآخرها صلاة زي ما بدأت بالصلاة **"وَالَّذِينَ هُمْ عَلَى صَلَاتِهِمْ يُحَافِظُونَ"** المعارج: ٣٤ يعني مش بيحي المسجد في الركعة الثانية وإلا الثالثة، ده من قبل الأذان يبقى في المسجد، بيحافظ، عامل سور حولين الصلاة بتاعته، عشان يحافظ على الصلاة بتاعته، ربنا بدأها بالصلاة وختمها بالصلاة عشان تعرف خطورة الصلاة في تربيتك الإيمانية يبقى سورة المعارج بتتكلم عن إيه؟ إنك أنت لازم كل يوم تقرب من ربنا خطوة، لازم المفهوم ده يترسخ في قلبك من الأول بحيث إنك في معراج مستمر إلى الله، عشان تصل إلى الله وقلبك يصل إلى عرش الرحمن قبل أن تموت، بعد كدة يا جماعة ال ٤ سور بتوع الدعوة سورة نوح، سورة الجن، سورة المزمل، سورة المدثر، ال ٤ دول لو أنت عايز تشتغل في الدعوة بيْفهموك حاجات كتير أوي في الدعوة

سورة نوح... الدعوة

يعني هنلقت من كل سورة حاجة كدة، سورة نوح بتتكلم عن إيه؟ شوف فن الدعوة عند سيدنا نوح، وشوف جهد الدعوة عند سيدنا نوح **"قَالَ رَبِّ إِنِّي دَعَوْتُ قَوْمِي لَيْلًا وَنَهَارًا"** نوح : ٥ رجل الدعوة، الأخ الملتزم اللي عايش عشان الدعوة **"لَيْلًا وَنَهَارًا"** ده يعني عايش عشانها، يعني إنسان كل حياته الدعوة، رجل الدعوة، عايزين في المنصورة دي بس ٥ رجالة دعوة، ٥ رجالة دعوة يكلم ده ويروح لده ويفوت على ده والبلد دي كلها تتغير تبقى راجل من رجالة الدعوة طيب لما بيتكلم طب ممكن جهد بس منفر يعني أسلوب كلامه وحش، بيكره الناس في الدين، لأ، طب شوفوا يقول **"فَقُلْتُ اسْتَغْفِرُوا رَبَّكُمْ إِنَّهُ كَانَ غَفَّارًا"** نوح : ١٠ طب لما نستغفر ربنا ونتوب إليه، لما نطيع ربنا، لما نلتزم شوف أول حاجة كلمهم فيها **"يُرْسِلِ السَّمَاءَ عَلَيْكُمْ مِدْرَارًا * وَيُمْدِدْكُمْ بِأَمْوَالٍ وَيُنَبِّئُكُمْ جَنَّاتٍ وَيَجْعَلُ لَكُمْ أَنْهَارًا"** نوح ١١ : ١٢ يبقى أول حاجة كلمهم فيها إيه؟ الأثر الدنيوي للدين

"مَا لَكُمْ لَا تَرْجُونَ لِلَّهِ وَقَارًا * وَقَدْ خَلَقَكُمْ أَطْوَارًا * أَلَمْ تَرَوْا كَيْفَ خَلَقَ اللَّهُ سَمَاعَاتٍ طِبَاقًا * وَجَعَلَ الْقَمَرَ فِيهِنَّ نُورًا وَجَعَلَ الشَّمْسَ سِرَاجًا" نوح ١٣ : ١٦ يبقى بعد كدة عظمة الله سبحانه وتعالى وقدرة الله سبحانه وتعالى **"وَاللَّهُ أَنْبَتَكُمْ مِنَ الْأَرْضِ نَبَاتًا * ثُمَّ يُعِيدْكُمْ فِيهَا"** نوح ١٧ : ١٨ الموت **"وَيُخْرِجُكُمْ إِخْرَاجًا"** البعث، يبقى اتعلم أول حاجة تكلم الناس إن ربنا هيدريك إيه في الدنيا لو أطعته، وهياخد منك إيه لو عصيته الحاجة الثانية عظمة ربنا وقدرة ربنا مُلك ربنا، الحاجة الثالثة هم الآخرة، دي لفتة سريعة كدة من سيدنا نوح، يعني من أعظم أساتذة البشرية في الدعوة، جهد الدعوة وفن الدعوة وفكر الدعوة

سورة الجن

بعد كدة سورة الجن، سورة الجن بتتكلم على إسلام الجن **"قُلْ أُوْحِيَ إِلَيَّ أَنَّهُ اسْتَمَعَ نَفَرٌ مِّنَ الْجِنِّ فَقَالُوا إِنَّا سَمِعْنَا قُرْآنًا عَجَبًا * يَهْدِي إِلَى الرُّشْدِ فَآمَنَّا بِهِ وَلَنْ نُشْرِكَ بِرَبِّنَا أَحَدًا * وَأَنَّهُ تَعَالَى جَدُّ رَبِّنَا مَا اتَّخَذَ صَاحِبَةً وَلَا وَلَدًا"** الجن ١ : ٣ سورة الجن رسالة دعوية، بيرسلها رفقاء الأمس في الضلال إلى من لا يزالون على الضلال إلى اليوم، يقولوا لهم يعني احنا كنا ضالين، وكنا بنشارككم في الضلال، العلاقة ما بين الجن والإنس، الجن أسلموا وبعثت رسالة لمشركوا مكة، ربنا بيوصلها عنهم، يقولوا لهم فوقوا زي ما احنا فوقنا **"وَأَنَّا لَمَسْنَا السَّمَاءَ فَوَجَدْنَاهَا مَلْتًا حَرَسًا شَدِيدًا وَشُهْبًا"** الجن :

٨ ويقولوا لهم "وَأَنَّهُمْ ظَنُّوا كَمَا ظَنَنْتُمْ أَن لَّن يَبْعَثَ اللَّهُ أَحَدًا" الجن: ٧ ده احنا كنا زيكم بنحسب لغاية ما سمعنا القرآن واهتدينا وتبنا

يعني سورة الجن موضوعها غريب جداً، رسالة دعوية من الجن إلى البشر، يبحثوهم فيها على الهداية، خدوا بالكم الجن في سورة الأحقاف أول ما سمعوا القرآن راحوا يعملوا إيه؟ راحوا يشتغلوا في الدعوة، والجن في سورة الجن أول ما سمعوا القرآن وآمنوا عملوا إيه؟ اشتغلوا في الدعوة، شايفين ربنا بيصور الجن إنهم شخصيات شديدة العبادة لما بتلتزم، شديدة الجهد في الدعوة لما بتلتزم، ليه يا جماعة؟ "خياركم في الجاهلية خياركم في الإسلام إذا فقهوا" صحيح الجن مخلوقات ساخنة، نار أصلاً، فلما بيعرف الحق بيبقى سخن في الحق، فعشان كدة تلاقي الشاب اللي إنتمازه وحش أوي، يعني كان ضايع قوي قبل الإلتزام لما يلتزم بيبقى خطير، ويشتغل في الدعوة ويجري ويضحى ليه؟ لأنه كان سخن أصلاً فعشان كدة لو أنت عايز تنقي ناس من صحابك تدعوهم الأول، نقي أشد واحد فيهم في الضلال لأن ده لما هيلتزم هيبقى أحسن واحد في الإلتزام، معايا يا جماعة؟ يبقى إذا السخونية

يظن السعادة في المعصية...عذابا صعبا

من ضمن الآيات الخطيرة اللي في سورة الجن "لِنَفْتِنَهُمْ فِيهِ وَمَن يُعْرِضْ عَن ذِكْرِ رَبِّهِ يَسْلُكْهُ عَذَابًا صَعَدًا" الجن: ١٧ ياه ربنا كأنه بيقولك اللي بيدي ظهره لربنا ربنا بيسلكه عذاب صعدي، يعني عذاب متصاعد، يعني كل عذاب أشد من العذاب اللي قبله، يعني يعيش حياته يعصي ربنا سبحانه وتعالى، فلما يعصى ربنا يلاقي نفسه عنده إكتتاب وضيق وخنقة، ومش عارف يعيش ومش عارف ينام ومعيشة ضنك، يقول إيه طب أنا أزيل الإكتتاب إزاي أعصي معصية أرفه عن نفسي بيها، يعصي يزيد الإكتتاب، يعيش حياته كلها مخنوق

أما يجي يموت يقول أخيراً هموت واستريح من الدنيا الكئيبة دي، يدخل القبر يفاجأ إن آلاف السنين قاعد يتعذب في القبر والعياذ بالله، ضمة القبر اللي بتختلف فيها أضلاعه، الجليس السوء، عمله السوء لما بيدخل عليه يقول له انت مين؟ الوش القبيح بتاعك ده مين؟ الشكل القبيح بتاعك مين؟ يقول له أنا عمك السوء والعياذ بالله، انت مش فاكربي؟؟؟ مش فاكرك المعاصي اللي عملتها، مش فاكرك الوقعات اللي وقعتها، مش فاكرك الشهوات اللي ملت حياتك بيها، مش فاكرك كذا وكذا وكذا

يخلص كذا ألف سنة عذاب في القبر، يجي يوم القيامة أخيراً هخرج من الردمة اللي أنا فيها، وهخرج من البرزخ اللي أنا فيه يلاقي خمسين ألف سنة أهوال ورا بعضها، يوم القيامة يلاقي ميزان وصراط، وعرض على الله وقنطرة بتؤخذ منه الحقوق وتطير صحف وعرق بيلكمه، يلاقي أهوال، يعني يصحى يوم القيامة بس يلاقي سيدنا موسى تخيلوا يا جماعة الأنبياء نفسهم موقفهم إيه يوم القيامة

لما سيدنا محمد صلى الله عليه وسلم تلاقيه ساكن تحت العرش قاعد يدعي ربنا يرحم الخلق، وسيدنا آدم قاعد يقول يارب سلم سلم، أنا أذنبت ذنب لا أدري أن يغفر لي أم لا؟ والأنبياء جاين علي ركبهم، جاين علي الركب بتاعتهم، وسيدنا موسى آخذ بقوائم العرش من شدة التوسل إلى الله والتضرع إلى الله، تخيلوا يا جماعة المنظر ده لما يشوف أصحابه كدة ويشوف الناس ده العرق غطي وشه، وده العرق غطي صدره، وده العرق غطي رجله، ده انت تعرف الناس دي، الناس اللي بالمنظر ده انت عارفها

تخيل خمسين ألف سنة أهوال لما يخلص، خلاص خلصوا، يفاعاً إن النار أشد وأشد وأنكى وأنكى، قعد في الدنيا سنين وقعد في القبر آلاف، قعد في القيامة خمسين ألف، الله اعلم هيقعد أد ايه في النار بالذنوب بتاعته والمعاصي بتاعته، يبقى إذا يا جماعة " **عَذَاباً صَعْدًا** " عذاب متصاعد والعياذ بالله، اللي يفكر في الآية دي هتفرق معاه جامد

نعيماً صعداً

واللي بيطلع ربنا برضه يسلكه نعيماً صعداً، في الدنيا تلاقي نفسك مبتهج، طيب لما تيجي تموت أنا معقولة في نعيم أكثر من نعيم جنة الدنيا اللي أنا عشتها، تلاقي تنزل عليك الملائكة أفواج وراء أفواج وأنت بتموت، تبشرك بالجنة ورؤية وجه الله وبصحبة النبي صلى الله عليه وسلم، يبقى الموت نعيم، وبعد كدة في القبر يفتح لك باب في الجنة تخيل باب في الجنة يفتح لك، تشوف جزء من الجنة وجزء من رياضها، بعد كدة يوم القيامة منابر النور ووفد المتقين اللي بيساق للرحمن، وظل عرش الله وصحبة النبي صلى الله عليه وسلم عند الحوض، بعد كدة الجنة نعيم محصلش، عمرك ما كنت تتخيله، بعد كدة مفيش أكثر من كده رؤية وجه الله والنظر لوجه الله سبحانه وتعالى، نعيماً صعداً

سورة المزمل...إصلاح القلب

" **يَا أَيُّهَا الْمُزَّمِّلُ * قُمِ اللَّيْلَ إِلَّا قَلِيلًا** " المزمل ١ : ٢ المزمل بتقولك إنك أنت عشان تشتغل في الدعوة لازم تصلح قلبك، تربية القلب، بتتكلم عن إصلاح القلب، بتديك روشنة لإصلاح القلب، إيه هي الروشنة؟ ركز معايا عشان دي روشنة خطيرة جداً، الأرض مش نضيفة وملبانة كراكيب، عايز ازرعها، انضف، وبعد كدة أرمي البذور بعد ما الأرض نضفت، تطلع شجرة والشجرة بيطلع عليها الثمار، مادام أنا أتعهدها وأرعهاها هوا ده سورة المزمل سورة المزمل بتقولك أول حاجة تنضف بيها قلبك العبادات من الشهوات والشبهات والأمراض، أول حاجة تنضف بيها قلبك العبادات، قلبك نضف ابدأ تعرف إلى الله، بذور معرفة الله تترمي في قلبك، فتبدأ شجرة الإيمان واليقين تنمو، لما تنمو أي شجرة ليها ثمار، ثمار شجرة الإيمان مقامات، تلاقي بقى عندك يقين، بقى عندك صدق بقى عندك إخلاص، عشان كدة الإخوة اللي يقولك أنا عايز أحس بالإخلاص، عايز أحس بالتوكل، أما اسمع شريط عن الإخلاص، شريط عن التوكل، لا يا جماعة مش دي السكة، يا جماعة الثمار دي هتطلع لوحدها لو الشجرة طلعت، أنت تركيزك إنك تنضف التربة وإن الشجرة تطلع، والثمار تطلع لوحدها

قال تعالى " **يَا أَيُّهَا الْمُزَّمِّلُ * قُمِ اللَّيْلَ إِلَّا قَلِيلًا * نِصْفَهُ أَوْ انْقُصْ مِنْهُ قَلِيلًا * أَوْ زِدْ عَلَيْهِ وَرَتِّلِ الْقُرْآنَ تَرْتِيلًا * إِنَّا سَنُلْقِي عَلَيْكَ قَوْلًا ثَقِيلًا * إِنَّ نَاشِئَةَ اللَّيْلِ هِيَ أَشَدُّ وَطْءًا وَأَقْوَمُ قِيلًا * إِنَّ لَكَ فِي النَّهَارِ سَبْحًا طَوِيلًا * وَاذْكُرِ اسْمَ رَبِّكَ وَتَبَتَّلْ إِلَيْهِ تَبْتِيلًا** " المزمل ١ : ٨ أربع سطور عبادات ذكر و إنقطاع للعبادة بالقلب والجوارح وقراءة قرآن وقيام ليل، أربع سطور عبادات، وبعد كدة سطر واحد معرفة الله، كأن ربنا بيقولك العبادات دي أكثر حاجة تعجب فيها بعد كدة سطر معرفة الله " **رَبُّ الْمَشْرِقِ وَالْمَغْرِبِ لَا إِلَهَ إِلَّا هُوَ فَاتَّخِذْهُ وَكِيلًا** " المزمل: ٩ الربوبية ثم الألوهية، لما جت معرفة الله نمت شجرة الإيمان في القلب، بعد ما العبادات نضفت المكان تطلع ثمار المقامات

"فَاتَّخِذْهُ وَكِيلًا" المزمّل: ٩ التوكل يجي بكلمة "وَاصْبِرْ عَلَىٰ مَا يَقُولُونَ وَاهْجُرْهُمْ هَجْرًا جَمِيلًا" المزمّل: ١٠ الصبر يجي بكلمة، يبقى إذا طريق إصلاح القلوب يبدأ بالعبادات، ثم التعرف إلى الله سبحانه وتعالى

سورة المدثر... قُمْ فَأَنْذِرْ

سورة المدثر بتديك في الأول روشنة عشان تخرج للدعوة وأنت راجل فعلاً، هتثبت مهما كانت معوقات الدعوة "يَا أَيُّهَا الْمُدَّثِّرُ * قُمْ فَأَنْذِرْ" المدثر: ١: ٢ أول حاجة " قُمْ " دي يعني مش قف علي رجلك، قوم، قام لله، إزاي الضلال في الأرض وأنت تمام؟! قوم لله، والمدثر: الدثار ده اللي هو اللبس اللي المسلم بيلبسه علي جسمه لما الصحابة راحوا لرسول الله صلى الله عليه وسلم قالوا له " ذهب أهل الدثور بالأجور " الدثور دي اللي هما الناس الأغنياء اللي لا بسين لبس فخم، فأهل الدثور دي رمز للغنى

"يَا أَيُّهَا الْمُدَّثِّرُ" المدثر: ١ لا سيبك من البلوفر أبو ١٨٠ جنيه والا معدش ب ١٨٠، كان أيامنا كان ب ١٨٠، وسيبك من البنطلون أبو مش عارف إيه وسيبك من الكوتشي أبو ٥٠٠ جنيه، سيبك من الكلام ده، شغل الدعوة مش عايز الكلام ده، شغل الدعوة عايز واحد يقدر يستحمل العيشة الصلبة، عايز واحد ينزل وسط أفريقيما يدعوا الوثنين اللي هناك ويستحمل المياه اللي مش نضيفة والباعوض، يستحمل كل حاجة عشان ربنا سبحانه وتعالى

"يَا أَيُّهَا الْمُدَّثِّرُ" المدثر: ١ خلاص بقي الدثار ده معدش دلوقتي "قُمْ فَأَنْذِرْ * وَرَبِّكَ فَكْبِّرْ" المدثر: ٢: ٣ يعني إيه؟ يعني خلي ربنا أكبر حاجة في حياتك، إزاي؟ أكبر من الشهوات، أكبر من أى عرض دنيا يتعرض عليك وأنت في طريق الدعوة أعلى حاجة، لأن ممكن واحد وهو شغال في الدعوة يجي له عرض دنيا يتلهي فيه ينسى الدعوة إلى الله، أوعى حاجة تبقى أكبر في قلبك من الله، الله أكبر من أهل الباطل وأكبر من قدرة أهل الباطل، اوعى خوفك من أهل الباطل يوقفك، يبقى كلمة "وَرَبِّكَ فَكْبِّرْ" المدثر: ٣ تخليك متسبش الطريق أبداً، مفيش حاجة تخوفك وتصرفك عنه أبداً، لا دنيا ولا أهل باطل

"وَتِيَابِكَ فَطَهِّرْ" المدثر: ٤ يعني إيه؟ يعني ليها معنين يا جماعة، ثيابك اللي هي هدومك، أيوه خليك لبسك نضيف وخليك شكلك نضيف، وخليك إنسان دائماً محدش يبص لك، لا خليك زي ما بتتهمم بالجواهر تهتم بالمظهر، تاني حاجة الثياب برضه رمز للباطن وإصلاح الباطن، خليك طاهر القلب من جوه، سليم النفس من جوه

"وَالرُّجْزَ فَاهْجُرْ" المدثر: ٥ اوعى تقول للناس متعصوش ربنا وتعصي أنت ربنا، قبل أن تكون مصلحاً يجب أن تكون صالحاً، وربنا مقلش والرجز فاترك، أصل أنا ممكن أترك المعصية وأنا نفسي فيها، إنما الهجر ده هجر جوارح وهجر قلب، يعني أنا بسببها وأنا كارهها، يعني لازم وانت شغال في الدعوة تبقى قلبك أعلى من غيرك تبقى كاره المعصية، ليه؟ عشان أنا لو جيت فعلاً أكلمك انك تسبب المعصية وأنا أكرهها انت كمان هتكرها، إنما لو جيت أكلمك عنها وأنا مجبها مش هقدر أوصلك أبداً إن المعصية دي حاجة تتكره

" وَالرُّجْزَ فَاهْجُرْ * وَلَا تَمَنَّ أَنْ تَمُنَّ تَسْتَكْثِرُ " المدثر: ٥: ٦ اوعى بعد ما تتعب في الدعوة وتبذل وتضحى بمالك وجهك اوعى تحسب إنك عملت حاجة لربنا، لا اوعى تمن على الله بجهدك، انت اللي فقير إلى الله، ده كرم من ربنا إنه استعملك في

الدعوة شوف كام ألف واحد ملتزم في المسجد اللي أنت بتصلي فيه مبيشتغلش في الدعوة، شوف كام واحد في صلاة التراويح والتهجد يبكوا جنبك مبيشتغلوش في الدعوة، يبقى ده كرم من ربنا

"وَلِرَبِّكَ فَاصْبِرْ" المدثر: ٧ استحمل أي حاجة تحصل لك **عشان ربنا سبحانه وتعالى**، يبقى إذا سورة المدثر بتكلمنا عن زاد الداعية إلى الله، إزاي يبقى عندك زاد في الدعوة إلى الله

بعد كدة باقي السورة كلها ترهيب شديد جداً، كلها بتتكلم عن سقر، اللي هي من سقرته الشمس يعني أذابته، يعني كأن النار دي بتصهر لحم الإنسان والعياذ بالله، بتصهر الإنسان **"مَا سَلَكَكُمْ فِي سَقَرٍ * قَالُوا لَمْ نَكُ مِنَ الْمُصَلِّينَ * وَمَنْ نَكُ نُطْعِمُ الْمِسْكِينَ"** المدثر ٤٢ : ٤٤ بيكلمك عن سقر وعن عذاب الناس في النار والعياذ بالله، بيكلمك علي جهنم اللي عليها التسعة عشر، تسعة عشر إيه؟ الله أعلم، الخزنة بتوع جهنم

بتكلمك عن **"ذُرِّي وَمَنْ خَلَقْتُ وَحِيداً"** المدثر: ١١ يعني إيه؟ تلاقي شاب شخصيته محصلتش وتلاقي إيه وحيد مافيش زيه لا في الذكاء ولا في المواهب ولا في المركز **"ذُرِّي وَمَنْ خَلَقْتُ وَحِيداً * وَجَعَلْتُ لَهُ مَالاً مَمْدُوداً"** المدثر ١١ : ١٢ الكفار بتوع قريش، مال ممدود يعني إيه يا جماعة؟ يعني أنا الوقتي ممكن عندي مليون جنيه، إنما لو صرفت هيخلصوا، إنما ممكن واحد عنده تجارة، عنده مليون جنيه وكل يوم بيكسب عشر آلاف جنيه، كل يوم عشر آلاف جنيه فهو بيصرف مهواش خايف **"وَجَعَلْتُ لَهُ مَالاً مَمْدُوداً * وَبَيْنَ شُهُوداً"** المدثر ١٢ : ١٣ كمان ولاده رجالة يقفوا مكانه في التجارة، يروحوا معاه القعدات بتاعة كبار القوم، رجالة سندنه مش عيال تعبينه ولا تعبين قلبه

"وَمَهَّدْتُ لَهُ تَمْهِيداً" المدثر: ١٤ مافيش مشاكل في حياته، مافيش عقبات في حياته، ذلت له كل حاجة، وبعد كدة عصاني وكفر بيا **"ثُمَّ يَطْمَعُ أَنْ أَزِيدَ * كَلَّا"** المدثر ١٥ : ١٦ ثم يطمع أن إيه؟ المفروض كان أزيدي لا مجتث ألف المد هنا كأن ربنا يقول إن ده هيتقطع عنه المدد بسبب معصيته وبسبب كفره، فكلمة أزيد كلمة معناها الزيادة، ولكن من إعجاز القرآن أفاد بحذف الألف إنما ستؤدي إلى النقص، يبقى سورة المدثر وقبلها المزمل والجن ونوح بيكلموك عن مبادئ في الدعوة، جهد الدعوة أد إيه، فكر الدعوة أد إيه، إصلاح قلبك وتربية قلبك نرجع تاني يا جماعة للرفاق بقي

سورة القيامة

النفس اللوامة **"وَلَا أَقْسِمُ بِالنَّفْسِ اللَّوَّامَةِ"** القيامة: ٢ الإنسان اللي عايز بس مش قادر، اللي نفسه يتوب بس مش قادر، هتلاقي النوعية دي كتير جداً إن هو عايز بس مش قادر، **اللي عايز بس مش قادر ده أكثر حاجة تنفع معاه الترهيب**، خدوا بالكم اللي مش عايز، اللي مقفول من الدين لو كلمته عن النار يتقفل منك أكثر، ويتقفل من المنتزمين أكثر ليه؟ لأنه مقفول أصلاً يقول يا عم دول متطرفين، إنما اللي عايز بس مش قادر ده الكلام عن النار والموت والقبر معاه أكثر حاجة بتفيد ليه؟ لأنه فعلاً عايز، فهو محتاج حاجة تخوفه عشان ينطلق، عشان كدة النوعية دي ربنا كلمها إزاي؟ إداها صواعق، صواعق كهربائية في السورة

الصاعقة الأولى

"فَإِذَا بَرِقَ الْبَصْرُ * وَخَسَفَ الْقَمَرُ * وَجُمِعَ الشَّمْسُ وَالْقَمَرُ * يَقُولُ الْإِنْسَانُ يَوْمَئِذٍ أَيْنَ الْمَفَرُّ * كَلَّا لَا وَزَرَ" القيامة ١١: ٧
 لما الانفجارات الكونية تظهر، والشمس والقمر تبقى في حالة الخسوف، يعني الأرض تبقى ما بين الشمس والقمر يتجمعوا يعني يدكوا في الأرض هما الأثنين، لأن الأرض كانت ما بينهم، خسوف القمر يعني الأرض بقت ما بينه وبين الشمس "يَقُولُ الْإِنْسَانُ يَوْمَئِذٍ أَيْنَ الْمَفَرُّ * كَلَّا لَا وَزَرَ" معدتش فيه خلاص "إِلَىٰ رَبِّكَ يَوْمَئِذٍ الْمُسْتَقَرُّ" القيامة:

١٢

الصاعقة الثانية الصاعقة الكهربائية الثانية لحظة الوقوف أمام الله "يُنَبِّئُ الْإِنْسَانَ يَوْمَئِذٍ بِمَا قَدَّمَ وَأَخَّرَ" القيامة: ١٣ كل حاجة "بَلِ الْإِنْسَانُ عَلَىٰ نَفْسِهِ بَصِيرَةٌ * وَلَوْ أَلْقَىٰ مَعَاذِيرَهُ" القيامة ١٤: ١٥ ساعة ما يقابل ربنا هو نفسه على نفسه بصيرة هيقول إيه؟! وهيقدم لربنا إيه؟! وهيستر نفسه أمام ربنا بإيه؟! خلاص كل شئ انتهى

بعد كدة الحنة دي بتعلم الدعاة لما الرسول صلى الله عليه وسلم يسمع الكلام ده هيخاف ولا لأ؟ هيخاف على الناس ولا لأ؟ هيخاف على الناس، يعني الناس هيحصل فيها كدة، أما أقوم أجري أقول للناس "لَا تُحْرِكْ بِهِ لِسَانَكَ لِتَعْجَلَ بِهِ" القيامة: ١٦ استنى متستعجلش سيب القرآن ينزل علي قلبك الأول، اوعى تجري على الناس وانت لسة مثبتش إيمانياً، يعني إيه؟ يعني اوعى خوفك على الناس ينسيك نفسك وإهتمامك بقلبك وإيمانك

الصاعقة الثالثة

بعد كدة الصاعقة الثالثة لما منظر "وَوُجُوهٌ يَوْمَئِذٍ بَاسِرَةٌ * تَتَّظُنُّ أَنْ يُفْعَلَ بِهَا فَاقِرَةٌ" القيامة ٢٥: ٢٤ "بَاسِرَةٌ" عارفين الأطفال المبتسرين؟ اللي هو اتولد وهو صغير جسمه صغير قوي منحسف كدة، البسر إن الوش اتخسف، يعني تلاقي الحدود دخلت لجوه، والدم راح من الوش، فالوش لونه راح، والوش دخل لجوه، إنخساف الوجه وإنخساف الصدغين والعياذ بالله "بَاسِرَةٌ * تَتَّظُنُّ أَنْ يُفْعَلَ بِهَا فَاقِرَةٌ" العمود الفقري يا جماعة، هما ليه سموه الفقرفقر؟ اللي معهوش فلوس قالوا فقير، ليه سموه فقر؟ لأن الفقر هو إن ضربة تيجي في العمود الفقري تكسره، طب الوقي لما تكسره يحصل إيه؟ الإنسان يتشل والعياذ بالله، ميعرفش حتى يقضي حاجته، يبقى الفقر سموه فقر لأن الإنسان بيبقى مشلول، عايز تنزل تروح درس في الجامع معكش ريال تركب ميكروباص، مشلول مش عارف تروح ولا تيجي، يبقى عشان كدة سموه فقر "تَتَّظُنُّ أَنْ يُفْعَلَ بِهَا فَاقِرَةٌ" القيامة: ٢٥ يعني تنال من الصعقات والضربات اللي بتشل شلل تام، تغل بالأغلال وتسلسل بالسلاسل اللي بعده تشل شلل تام

الصاعقة الرابعة

"كَلَّا إِذَا بَلَغَتِ التَّرَاقِيَ" القيامة: ٢٦ لما الروح توصل للتراقي هنا "وَقِيلَ مَنْ رَاقٍ" القيامة: ٢٧ مين اللي هيطلع بالروح؟ ملائكة الرحمة ولا ملائكة العذاب، مين اللي هيطلع بروحك فكرت ولا لأ؟ مين اللي هيصعد بروحك إلى الله؟ "وَقِيلَ مَنْ رَاقٍ * وَظَنَّ أَنَّهُ الْفِرَاقُ وَالْتَقَّتِ السَّمَاءُ بِالسَّمَاءِ * إِلَىٰ رَبِّكَ يَوْمَئِذٍ الْمَسَاقُ" القيامة: ٣٠: ٢٧ فراق الأموال وفراق الأشياء، وفراق الشهوات وفراق المحبوبات، حسرة وما بعدها حسرة، في هذه اللحظة الأليمة والإنسان بيص على الدنيا وهو يبفارقها، انت اللي حبتها، لو مكنتش حبتها مكنتش عشت اللحظة دي إمال المؤمن وظن إنه إيه؟ اللقاء، العاصي ظن أنه الفراق " وَظَنَّ أَنَّهُ الْفِرَاقُ " لأن قلبه مع الدنيا، إنما المؤمن قلبه مع الله، اليوم ألقى الأحبة محمداً صلى الله عليه وسلم وصحبه، يبقى المؤمن فرحان للي هو هيقابله، إنما الثاني والعياذ بالله

زعلان إن هو هيسيبه "وَلَنْ أَنَّهُ الْفِرَاقُ وَالْتَقَتِ السَّاقُ بِالسَّاقِ * إِلَى رَبِّكَ يَوْمَئِذٍ الْمَسَاقُ " يبقى سورة القيامة صدمات كهربائية، صواعق كهربائية نازلة علي قلب كل واحد عايز بس مش قادر عشان تقول له إن كنت مش قادر علي نفسك الوقي هتقدر علي ده؟ لا يارب، خلاص استقيم علي أمر الله

سورة الإنسان

أصل الإنسان

بعد كدة سورة الإنسان بتتكلم عن إيه؟ سورة الإنسان من أولها كدة سورة الإنسان من أولها سخرية بالإنسان "هَلْ أَتَى عَلَى الْإِنْسَانِ حِينٌ مِّنَ الدَّهْرِ لَمْ يَكُنْ شَيْئاً مَّذْكُوراً " الإنسان: ١ انتم مكنتوش حاجة، انتم عارفين يا جماعة ده الواحد بيعسب بيه؟ أما واحد كدة أنت جبتة وهو كان عدمان، اديته قصر واديته فلوس وأكرمتة وعملت له، وعملت له حاجات كتير أوي وهو كان عدمان خالص، فلما نال كل ده جه اتكبر عليك، فتقول له سعادتك يا باشا افكر إنك انت كنت شحات، افكر إنك انت كنت ولا شئ، أهو ربنا كأنه بيقولك افكروا انتم كنتم إيه؟ انت مكنتش حاجة أصلاً "لَمْ يَكُنْ شَيْئاً مَّذْكُوراً"

"إِنَّا خَلَقْنَا الْإِنْسَانَ مِن نُّطْفَةٍ أَمْشَاجٍ نَّبْتَلِيهِ فَجَعَلْنَاهُ سَمِيعاً بَصِيراً " الإنسان: ٢ ده انت جاي من حته نطفة، أنت جاي من مئى، ده كل الناس جاية منه، أمشاج، شوية من سائل بروتاتنا على شوية من الحيوانات المنوية على شوية من سائل المرأة، إيه ده؟ انت كنت ده؟ آه انت كنت ده، هو ده اللي أنت جاي منه، يبقى افكر انت كنت إيه! شايف أنت كنت إيه!

فضل الله ونعمه

"إِنَّا خَلَقْنَا الْإِنْسَانَ مِن نُّطْفَةٍ أَمْشَاجٍ نَّبْتَلِيهِ فَجَعَلْنَاهُ سَمِيعاً بَصِيراً " الإنسان: ٢ شايف الإكرام، شايف رفعك أد إيه؟ شايف بعد ما كنت "فَجَعَلْنَاهُ سَمِيعاً بَصِيراً " الإنسان: ٢ هتشكر وإلا هتكفر "إِنَّا هَدَيْنَاهُ السَّبِيلَ إِمَّا شَاكِراً وَإِمَّا كَفُوراً" الإنسان: ٣ كان المتوقع إن ربنا يقول إما شاكراً وإما كافراً، أو يقول إما شكوراً وإما كفوراً، إنما لما اتكلم عن الشكر جاب عبد شاكراً، ولما اتكلم عن الكفر جاب صيغة المبالغة " فعول " كفور، لأن يا جماعة الإنسان حتى لما يبشكر يعني بيبقى على الأد كده، إنما الشكور بجد "وَقَلِيلٌ مِّنْ عِبَادِيَ الشَّكُورُ " سبأ: ١٣

الشاكِر والمجاهد

طب اللي مش هيشكر الإكرام اللي ربنا كرمه له ده كله، بعد ما كان إيه، شوف "إِنَّا أَعْتَدْنَا لِلْكَافِرِينَ سَلَاسِلًا وَأَغْلَالًا وَسَعِيرًا " الإنسان: ٤ سلاسل يتساقوا منها زي البهائم، وأغلال يتقيدوا بيها ويتساقوا منها زي البهائم يعني شايف هيوطى لأحط شئ يوم القيامة إذا مشكرش ربنا، تروح منه نعمة التكريم

طب اللي شكر النعمة "إِنَّ الْأَبْرَارَ يَشْرَبُونَ مِن كَأْسٍ كَانَ مِزَاجُهَا كَافُوراً " الإنسان: ٥ الأبرار كاملي الطهارة، اللي حياته كلها طاعة "إِنَّ الْأَبْرَارَ يَشْرَبُونَ مِن كَأْسٍ كَانَ مِزَاجُهَا كَافُوراً * عَيْنًا يَشْرَبُ بِهَا عِبَادُ اللَّهِ يُفَجِّرُونَهَا تَفْجِيراً * يُوفُونَ بِالنَّذْرِ وَيَخَافُونَ يَوْمًا كَانَ شَرُّهُ مُسْتَطِيراً وَيُطْعَمُونَ الطَّعَامَ عَلَى حُبِّهِ مِسْكِيناً وَيَتِيماً وَأَسِيرًا" الإنسان: ٥: ٨ خدوا بالكم

شايقين الأخلاق، ويطعمون إيه؟ مسكيناً وبتيمناً وأسيراً مع التوحيد على طول، يعني حتى الكافر اللي وقع في إيدك برضه تكرمه عشان أخلاق الدين تظهر أمام الجميع

"إِنَّمَا نُطْعِمُكُمْ لِرُوحِهِ اللَّهُ لَا نُرِيدُ مِنْكُمْ جَزَاءً وَلَا شُكُوراً" الإنسان: ٩ يبقى الرجاء في الله سبحانه وتعالى "إِنَّا نَخَافُ مِنْ رَبِّنَا يَوْمًا عَبُوسًا قَمْطَرِيرًا" الإنسان: ١٠ العبوس بتاع يوم القيامة، العبوس ده لما أعبس في وشك يبقى أنا هعمل فيك حاجة، فلما تشوف اللي بيحصل يوم القيامة يبقى أنا بالتأكيد هيحصل فيا حاجة، إمال كل ده ليه، الملائكة دي ليه؟ والعذاب ده ليه؟ والنار اللي بتسعر ليه؟ "قَمْطَرِيرًا" يعني شديد حر وعرق وطول إنتظار وندم وحسرات

نعيم وسعادة

"إِنَّا نَخَافُ مِنْ رَبِّنَا يَوْمًا عَبُوسًا قَمْطَرِيرًا * فَوَقَاهُمُ اللَّهُ شَرَّ ذَلِكَ الْيَوْمِ وَلَقَّاهُمْ نَضْرَةً وَسُرُورًا" الإنسان ١٠: ١١ اسمع شوف! كان مكرم في الدنيا لما أهان نفسه وعصا أهين أد إيه في الآخرة، ولما أطاع ربنا هيكرمه أد إيه "وَجَزَّاهُمْ بِمَا صَبَرُوا جَنَّةً وَحَرِيرًا" الإنسان: ١٢ ده الحرير ده لبس بنات الملوك، فتخيل بقى أما أهل الجنة بيلبسوا منه، النعيم اللي فيه شكله إيه "وَجَزَّاهُمْ بِمَا صَبَرُوا جَنَّةً وَحَرِيرًا * مُتَّكِنِينَ فِيهَا عَلَى الْأَرَائِكِ" حياة الأنتكة، حياة الفخفخة "لَا يَرَوْنَ فِيهَا شَمْسًا وَلَا زَمْهَرِيرًا" مافيش ولا حر ولا برد يضايقهم، مافيش أى حاجة تضايقه، الأرائك دي اللي عاملة زي الكوشة بتاعة الزفاف، يعني كأنه يعني عايش في قمة الإكرام وقمة الإحتفاء و الإحتفال به "مُتَّكِنِينَ فِيهَا عَلَى الْأَرَائِكِ لَا يَرَوْنَ فِيهَا شَمْسًا وَلَا زَمْهَرِيرًا * وَدَانِيَةً عَلَيْهِمْ ظِلَالُهَا وَذُلَّتْ قُطُوفُهَا تَذَلِيلًا" الإنسان ١٣: ١٤ يعني مش أنا اللي أروح للظل، ده الظل هو اللي جي لي كمان

"وَإِنِّي عَلَيْهِمْ ظَالِمٌ مِثْلُ الظُّلِّ وَالظَّلْمَةُ أَظْلَمُ مِنَ الظُّلِّ" الإنسان: ١٤ مش أنا اللي هروح أجبب الفاكهة، ده الفرع اللي هيحي لغاية عندي "وَيَطُوفُ عَلَيْهِمْ وِلْدَانٌ مُخَلَّدُونَ إِذَا رَأَيْتَهُمْ حَسِبْتَهُمْ لُؤْلُؤًا مَنثورًا" الإنسان: ١٩ وفي سورة الطور وَيَطُوفُ عَلَيْهِمْ غِلْمَانٌ لَهُمْ كَأَنَّهُمْ لُؤْلُؤٌ مَكْنُونٌ" الطور: ٢٤ يبقى فيه خدم خصوصي، وفيه خدم عمومي، اللؤلؤ المنثور ده اللي هو منثور في الجنة رايح جاي منك لغيرك، اللؤلؤ المكنون ده اللي في قصرك بس اللي بيخدمك بس، ده كأن فيه خدم خصوصي لحضرتك وخدم عمومي بتشارك فيه أنت وغيرك

"وَيُسْقَوْنَ فِيهَا كَأْسًا كَانَ مِزَاجُهَا زَنْجَبِيلًا" الإنسان: ١٧ يسقون مش يشرب، يعني كمان يتسقي، الحورية بتاعتك مراتك، يسقون فيها من شدة الرفاهية اللي هما عيشين فيها "إِنَّ هَذَا كَانَ لَكُمْ جَزَاءً وَكَانَ سَعْيِكُمْ مَشْكُورًا" الإنسان: ٢٢ يعني كأن ربنا بيقولك سبحانه وتعالى إن أنت لو أطعت ربنا في الدنيا شوف يكرمك أد إيه في الآخرة

سورة المرسلات... عظمة الله

ثم بعد سورة الإنسان آخر سورة اللي هي سورة المرسلات، وزى ما قولنا سورة المرسلات يا جماعة آخر سورة سمعتها آذان وقلوب الصحابة من فم النبي صلى الله عليه وسلم من قبل أن يموت، آخر صلاة صلاهم بها كانت صلاة المغرب صلى الله عليه وسلم قبل أن يشتد عليه المرض ويدخل عليه السكرات خرج صلى الله عليه وسلم صلى بهم المغرب بسورة المرسلات

تخيل كدة لما النبي صلى الله عليه وسلم آخر صلاة يصلي بالصحابة قام مصلي بالسورة دي، معناه إن المعاني بتاعتها مهمة قوي، طرقات طرقات طرقات على القلب، سورة المرسلات طرقات تتعلق بعظمة الله **"وَجَعَلْنَا فِيهَا رِوَاسِيَّ شَامِخَاتٍ وَأَسْقَيْنَاكُمْ مَاءً فُرَاتًا"** المرسلات: ٢٧ الواحد قلبه وهو بيسمع كلمة شامخات دي بيقتد يطلع معاه كدة، ويعني بتحس بالكلمة كدة فيها عظمة في الخلق يدل على عظمة في الخالق

"وَجَعَلْنَا فِيهَا رِوَاسِيَّ شَامِخَاتٍ وَأَسْقَيْنَاكُمْ مَاءً فُرَاتًا" المرسلات: ٢٧ الجبال عالية، لما تلاقي ساعات شط بحر كدة أو نهر أو حاجة عليه جبل إرتفاعه مثلاً ٢٠٠٠ أو ٣٠٠٠ متر، الجبل صبة واحدة فوق كدة تحس بشموخ في الخلق **"وَجَعَلْنَا فِيهَا رِوَاسِيَّ شَامِخَاتٍ وَأَسْقَيْنَاكُمْ مَاءً فُرَاتًا"** المرسلات: ٢٧ ليه الأنهار جت بعد الجبال؟ لأن كل منابع الأنهار عند جبال، هي اللي بيتكثف عندها السحاب، وده من الإعجاز العلمي، فتلاقي منظر الجبل الشامخ والنهر بينزل منه شلالات كدة، وبعد كدة دفاق هادر، وبعد كدة نهر يتشق، منظر بديع يا جماعة

السورة طرقات سريعة جداً فيما يتعلق بعظمة الله، بل طرقات في النار وعذاب النار **"انطَلِقُوا إِلَىٰ ظِلِّ ذِي تَلَاثِ شَعْبٍ"** المرسلات: ٣٠ مهوا عايز ظل، خدوا الظل اهو، ظل نار **"إِنَّمَا تَرْمِي بِشَرِّرٍ كَالْقَصْرِ"** المرسلات: ٣٢ الشرارة من كتر ضخامتها ربنا بيقول كالقصر **"كَأَنَّهُ جِمَالَتٌ صُفْرٌ"** المرسلات: ٣٣ عارفين جبال السفينة؟ الهلبات بتاعة السفينة؟ اللي هي كأن النار بترمي عليهم هلب نار، يقوم واخده مطوقه من وسطه ويخده بيلعه في النار تاني والعياذ بالله، يبقى منظر العذاب والتطويق اللي النار بتعمله عليهم في أرض المحشر

إمال المؤمنين؟ **"إِنَّ الْمُتَّقِينَ فِي ظِلَالٍ وَعُيُونٍ"** المرسلات: ٤١ أول كلمه إيه؟ **"فِي ظِلَالٍ"** دول في ظلال من النعيم وعيون وفواكه مما يشتهون، فسورة المرسلات سورة كلها طرقات وطلقات على القلب كي توقظ القلب النائم، يعني دي كانت إمامة عاجلة سريعة بالجزء التاسع والعشرين، زي ما قلنا يا جماعة دي سنة أولى إلتزام، المعاني بتاعة التسعة وعشرين والثلاثين سنة أولى إلتزام اللي لازم نترى عليها من دلوقتي بإذن الله

أقول قولي هذا واستغفر الله لي ولكم، سبحانك اللهم وبحمدك أشهد أن لا إله إلا انت استغفرك وأتوب إليك

تم بحمد الله

شاهدوا الدرس للنشر على النت في قسم تفريغ الدروس في منتديات الطريق إلى الله تفضلوا هنا :

<http://forums.way2allah.com/forumdisplay.php?f=36>